



Jane are ekerasi kia gatato. Nigo are n'omogoko omonene gosoa ase ekerasi eke kiaye ekeyia. Omwarimu oye nigo akorokwa Mrs. Orina. Jane nanchete omwarimu oye.

Mrs. Orina osomirie Jane gesa asoete esukuru ya Makutano Primary. Bono nario omwaka ochakire. Omwarimu oyo ngosomia are abana ebinto ebigeni.

Nigo bamotegererete kegima. Nkorabasomia are amatera amayia. Naende nigo akobaganera emegano emenge.





Aiga esukuru, kera omonto nkona gokwana are igoro y'oborwaire bw'ogokumia. Oborwaire obo nigo bokorokwa Korona. Abande nigo bakoboroka COVID-19. Obo n'oborwaire obogeni. Mrs Orina tana gotebia abana kende igoro y'oborwaire obo.


Abarimu bande nigo bakona gokwana igoro y'oborwaire obo. Abana nabarabwo inkona gokwana bare igoro y'oborwaire obo.

Abaibori barobwo nigo bakumetie mono ase eng'encho y'oborwaire obo.

Nigo bagokwana ase chisimi igoro ya Covid-19. Eretio negenderete gotebia abanto igoro ya Covid-19.

Nonye n'eterebiseni ebwate amang'ana amange igoro y'oborwaire obo obogeni. Omorai bw'ense ya Kenya nere ngokwana are igoro ya Covid-19.





Abanto abange tibamanyete igoro y’oborwaire bwa Konona. Abande nigo barenge goteba buna ande tibori bw’amaene. N’abande nigo barenge goteba ing’a kero kende borwaire obo tibwarenge aroro.

“Korona nigo enga rikuba.” Abanto bande bagateba.

“Nigo bobwekaine rikuba rikobwata omonto naende riabwena bwango. Acha teiyo y’okooboa oborwaire obo.” Abande bagateba.

Abande bagateba oborwaire obwo n’okoragereria korwa ase Nyasae. Bagateba ing’a abanto tibakonyara kwebachera oborwaire obo. Abanto bagaetana ebirengererio igoro y’oborwaire obo.





Rituko erimo Omorai bw'ense yaito akaenekia ing'a oborwaire obo bwaikikire aa Kenya. Omonto oyomo konya obonyorire.

Abanto abange bakaondoka mono. Nyuma y'engaki enke oborwaire obo bogachaka koambakera abanto bwango buna omorero bw'orosana. Abanto abange bakarwara oborwaire obo bwa Covid-19. Abande babo bagakwa.

Abanto bakaegwa amachiko amange ase eng'echo y'oborwarire obo. Nigo aya arenge gokonya egere oborwaire obo tibogenderera koambokera abanto. Chisukuru chionsi chigasiekwa. Jane amo n'abana b'ekerasi kiaye nabarabwo bagatiga kogenda esukuru.





Covid-19 nigo ekweorokia ase chinchera ao ao. Onde obwate riberera rinene ogasemigwa agende korora omonyagitari. Oyore gosesigwa nere agasemigwa arore omonyagitari.

Baria barenge gosinywa koeyana buya nabarabwo bakaganerigwa barore omonyagitari.

Abanto baria bare gosaa na gwatigwa emegongo nabarabwo bagachikwa bayerere gochia Nyagitari bwango buna ekonyarekana.





Abarai b'Eserekari y'Obochenu bagasomia abanto ebinto ao ao. Ekemo kiabo n'ogokorora gochia ase ekegokoro.

Abanto bagatebigwa batumie ebirangachibu ekero bagwasimora. Naende bagatebigwa basibie ebirangachibu biabo n'esabuni.

Abanto bagasemigwa tibakunakuna emenwa, amaiso ne chimioro n'amaboko amamwamu. Aya onsi nigo are kobwatigwa ase engecho y'ogwetanga korwa ase ebinyinyi bia Korona.






Abanto bagasemigwa besabe n'esabuni ase amache akonyororoka. Gwesaba nigo kogotorenda korwa ase ebinyinyi bia Korona.

Kera engaki omonto akorwa ase enka gose koirana inka nigo agwesaba. Nonya n'abana nabarabwo nabo bagosemigwa besabe buya.

Kera oyomo ase omochie bono nabo arenge gwesaba chinsa chionsi. Twensi nigo tware gwetanga konyora Covid-19.






Onye amache tari gotoka ang'e, abanto nigo bare gosemigwa baake amaboko eriogo ri'ogoita ebinyinyi. Erieta rinde ri'eriogo eri n'esanitaisa. Korende abanto abange tibanchete rimusu ri'eriogo eri.

Onde bwensi otare gweaka eriogo eri, rirorio goika are gwesaba ataraso etuka ende yonsi. Abanyatuka nigo bare koenekia buna aya akorekire.

Abanyatuka bande tibare gwancha kooneria omonto otesabeti. Nigo bare kwoboa buna eye nigo eragere Korona yambokere abanto bande.







Abarai b'Eserekari y'Obochenu bakarwa richiko. Ande onsi ase abanto bare gokunakuna goika asibigwe. Eye nigo yare gotanga okoambokera kw'ebinyinyi bia Korona biria bikoreta oborwaire bwa Covid-19.

Bagachika buna chigari chiria chikobogoria abanto chisiarerwe eriogo ri'ogoita ebinyinyi. Naende bagachika chimatatu chibogorie abanto abake nario bataikane ange.

Eke nakio kiagerete abanto bakarema na gochaka korina chigari echi. Nyuma y'engaki enke chimatatu echi naende chigachaka goichora abanto.






Abanto bare korwara oborwaire obo bwa Covid-19 bakagenderera komenteka Kenya. Abanto bono bagachikwa babeke ebituba masio, ebio naende bikorokwa chimasiki.

Abanto bagatebigwa babeke chimasiki echio buna egwenerete. Emasiki eyio goika etube omonwa ne chimioro. Konya Korona etaracha, n'abanyagitari boka bare kobeka chimasiki.

Korende bono kera omonto akaba okororekana buna omonyagitari.

Abanto bande bagachaka kweroseria chimasiki chiabo. Bagachirika amariko ao ao. Abande bakarika buna, “Nyasaye nagwanchete”, “Ninganchete Kenya”, “Tiga Toserie Korona” amo na amariko ande ao ao.






Abarai b'Eserekari y'Obochenu bagachika abanto babere chinka chiabo. Bagatebia abanto tibagenda ase emeganda y'abanto nario batambokeranie Korona.

Chisukuru chionsi chikagenderera gosiekwa.

Abanto baria bagokora egasi chiobisi bagasemigwa bakorere emeremo korwa chinka chiabo. Abanto bonsi bagatebigwa tibaikana ang'e ekeru bare ase emesangererekano.

Abanto bagachikwa tibabaisa gosagusana amaboko ekeru bagokwanania. Aya onsi nigo achigetwe egere Korona tebaisa koambokera korwa ase omonto oyomo gochia ase oria onde.






Chingaki echi chionsi, chisukuru chikagenderera gosiekwa. Korende Jane n'abana bande b'ekerasi kiaye bakaba n' egessio ekenene. Eye nase eng'echo omwarimu obo ,Mrs Orina amenyete ekenyoro ekemo nabarabwo.

Engaki eye y'erusa entambe, Mrs.Orina akabaretera akaretio kaye agake. Nigo bare gotegerera omwarimu bw'eretio ase esiteseni ekorokwa Edu Channel Radio.

Mrs. Orina nigo arenge koeresa abana aba amasomo ayio. Abana be chisukuru chinde nabarabwo ngosomigwa barenge nere. Bagancha mono gosomigwa n'omwarimu oyo. Abaibori nabarabwo bakagokigwa mono.





Abana bande imbarengeo bare gosoncha amasoma abo korwa ase eterebiseni ya EDU Channel TV. Nigo esiteseni eye yabwate abarimu ao ao b'amasomo ao ao.

Abana abange tibamanyete chingaki chi'amasomo y'ebirasi biabo. Nigo bare gotegerera na komongera amasomo onsi are gosomigwa. Eye ekagera bagasoma ebinto ebinge mono.

Kero kende nabo abarimu aba b'etibi bare koboria amaswari. Abana nigo bare korika amachibu ase ebitabu biabo. Abana bonisi bagaancha abarimu aba abageni mono.





Abana gete imbarengeo bare kobwatia amasomo abo goetera ase chisimi. Aba nabo bare konyara koiraneria amaswari a kera amasomo.

Chisukuru chinde inchireo chiare gotomera abana babo amasomo. Ase abana abwo, nonya chisukuru chiasiegetwe, ebitabu birobio nabo biatigarete biigoire.

Nonya amatuko aya, chisukuru inchire aroro chigosomeria abana babo goetera chisimi. Abana babo nigo baanchete amasomo aya. Nigo bagoteba buna amasomo aya nigo akobagokia mono.





Ekeru kegaika erusa eye entambe ekaera. Chisukuru chikaigorwa. Konya amatuko aetire amange korwa ekero abana barenge esukuru.

Bakagoka mono koirana chisukuru chiabo ao ao. Abarimu nabarabwo bakaigwa buya koirana gochia gosomia. Ebinto ebinge bigachenchia. Kera amwana goika are gwesaba amaboko ekero are esukuru. Naende goika bare gobimwa riberera. Naende goika abana bare kobererana are.

Jane akeboria buna, “Abarimu gose mbanyigwe inkoiraneria riswari kimbegete emasiki?”






Omoerio amang'ana amaya agatangaswa! Esindani ya korenda abanto korwa ase Korona ekanyorekana. Abanto baria bare kobetwa esindani eye tibarenge konyareka mono na Covid-19.

“Noche ong'ire imbetwe esindani ya Covid-19?” Jane akaboria ng'ina.

“Yaya.” Ng'ina akamoiraneria.

“Ase bono esindani eye neya abakoreri b'Obochenu, abasigari, abarimu amo na abanto abagotu.” Ng'ina akamoeresa.



Intomanyete buna oborwaire bwa Covid-19 tiboraera. Naende bwaitire abanto abange. Nonye mbono nabo abanto baoboete oborwaire obo. Jane aasemeretie buna chisukuru tichigosiekwa naende ase egeka egetambe.

